



Pego ya Bobegadikgang

Komiti ya Banka ya Botswana e e laolang Merokotso ya kadimo ya Madi

(Monetary Policy Committee - MPC) e kopane

Ka di 20 Tlhakole 2025

Bagaetsho, jaaka e le tsamaiso ya Banka, re letse re anamisa moalo wa tsamaiso ya merero ya tsa kadimo madi, go leka go laola kgolo ya ditlhwatlhwa. Pego e ya maabane, e ne e le go leka go sedimosetsa batsaya karolo ka fa komiti ya MPC e ikaelelang go tsamaisa ditshekatsheko monongwaga.

Komiti e kopana mo seemong sa itsholelo e e tswelletseng ka go sa dira sentle. Se se dirwa ke kwelo tlase ya mmaraka wa diteemane, le go tlhoka go atlega mo mehameng e mengwe ya itsholelo.

Le fa kgolo ya ditlhwatlhwa ele ko tlase gompieno, Komiti ya MPC e solofela gore e tla boela mo seelong se se beilweng sa 3% go ya kwa go 6% mo kotareng ya bobedi ya ngwaga ono go ya pele.

Le fa go ntse jalo, mabaka a a latelang a ka dira gore kgolo ya ditlhwatlhwa e fokotsege:

- i. go sa dira sentle ga itsholelo ya mono gae le ya mafatshe a sele;
- ii. seemo se se ko tlase sa letseno la madi a puso; le
- iii. kgolo e e ko tlase ya ditlhwatlhwa tsa leokwane mo mebarakeng ya mafatshefatshe.

Dintlha tse di latelang di ka dira gore kgolo ya ditlhwatlhwa e oketsege:

- i. kgolo ya ditlhwatlhwa tsa dijo le leokwane mo mebarakeng ya mafatshe go fetisa ka fa go akanyeditsweng ka teng;
- ii. tlhaelo ya dithoto mo mebarakeng ya mafatshe; ga mmogo le
- iii. kgotlhakgotlhano ya mafatshe mo go tsa sepolotiki, itsholelo le papadisanyo.

Mo gae, phetogo ya ditlhwatlhwa tse di laolwang ke Puso (administered prices) e ka fetola tebelopele ya kgolo ya ditlhwatlhwa.

Pego ya kabo madi a sechaba ya ngwaga wa 2025/26 (Budget Speech) e rulagantswe ka nako e seemo sa itsholelo se leng ko tlase. Ka jalo, ditshekatsheko di supa gore tiriso ya madi a akanyeditsweng e, ga ena go nna le seabe se se ntsi mo kgolong ya ditlhwatlhwa monogae.

Ka tebelopele ya gore kgolo ya ditlhwatlhwa e tla a tswelela e le kwa tlase, komiti ya MPC e tsere tshwetso ya go tlogela seelo sa morokotso (Monetary Policy Rate) se sa fetolwa mo go 1.9%. Komiti e tla tswelela e ntse e beile kgolo ya ditlhwatlhwa mo gae leitho go tsaya ditshwetso tse di maleba jaaka gale.